




Regd.No.19134/88 <http://www.kbc.org.in> NAI/220/99
No-G-4/Regd.Magazine/KBCThuso/MNP-81

KBC THUSO

So481

Kum 56 Ihinna

Lhadou/June 2019



Environment Day

JULY EVENT
Christian Natoh

Kumkim Audit - 2-5 | Youth Employee Day - 14 | Anthah lop - 21

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11



**9th May 2019 nin Saijang, Karbi anglong KBC Mission School
mun ding Rev. Dr. Solomon Rongpi in hondoh na neita**

www.kbc.org.in

**14th May 2019 nikho a Head Office Chapel hall mun a
KBC Worker's Consultative Programme kiman na.**



CONTENTS

THUMAKAI HO

1. Editorial/ Pate Mopohna	1
2. World Environment day/Pastor Henkholen Kipgen	3
3. Phatthei chan na Mipa / Rev. Kamboi Chongloi	8
4. Pentecost /Rev. Henjalen Doungei	10
5. Mol chondoh jouna /Rev. M Haokhothong	13
6. Mission Column	15
7. Men Column	19
8. Women Column	20
9. Youth Column	22
10. Literature Column	24
11. Report	27-31

EDITORIAL BOARD

<i>Chairman</i>	: Rev. Tonglet Haokip, President KBC
<i>Editor</i>	: Dr. M. Thongkhosei Haokip, General Secretary
<i>Joint Editor</i>	: Rev. Henjalen Doungei
<i>Contributing Editors</i>	: 1. Rev. Letpu Kipgen 2. Rev. Onthang Haokip 3. Rev. Kaikhokam Chongloi 4. Pastor Paokhohao Haokip 5. Pastor Satminlen Khongsai
<i>Cir. Manager</i>	: Ms. Lhingjanem Haokip
<i>Design & Layout</i>	: Hemkholen Haokip

THUSO LAHMAN

Church/Organisation/ DepartmentRs. 300/-
IndividualRs. 200/- (Post a Rs. 250/-)

Indian Overseas Bank, Imphal Branch

A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 8131803543 Contact thei.
Circulation to kisai lam Mobile No. 9862633173 bol ding.



“Pa te Mopohna”

Editorial

“Pateho, nanghon nachate chengu sunoh hih un, ajo le lungbeinan neiget un nate”. (Col.3:21)

Thumakai:

Amasatah in muntina um Kuki Christian chate jouse ahideh a KBC member ho jouse chung a i Pakaiyu Jesu Christa minin salaam kahinpe cheh uve. Tulha thupi “Pate Mopohna” ahito kilhon in, i houbung leh lhangpi hinkhoa sahphat ding tampi lah a Pa te mopohna hi jong poimo tah khat in kagelin ahi. Hiche article ah hin Kuki Christian te lah a Pa te mopohna ho themkhat itahlang no-mun ahiye.

Colosia mite henga Paul in lekha ana thotna ah, Christa a hinkho man ding thudol ahin seiyyin, numei, chapang chule pasal ho mopohna ahin seiye. Numeiho chun apasal teu thua anun ding, pasal ho chun ainneipi teu nunbol louva angailut dingu ahi ti aseipeh e. Abanah, chate ho ahilna ah, imalam jousea anu le apa teu

thu anun diu chu Pakai lunglam ahi atipeh uve. Hiche jouva chu Pate chungang hungchua, Pate hon achate chengu asuh noh lou dingvin thu apen ahi. Ajeh chu, chutia aboltengu le chapangho chu lungbeina a aneikhah theiyu ahi ati.

Hiche lai sunga Pate mopohna kiseihi nu te le cha te chungang akimui. Pasal ho (Pa-te) hon ainneipi te nunbol louva lungset joh ding ahi. Nunbol kiti hi lungset toh lamchuom chuom ajot ahi. Kinunbol na ah hin ngailut/ lungsetna hi apang beh seh tapoi ti ahin, lungset jalla inchen amasa pen a kisemdoh ahin, nunbolna hin inchen amachaalmo sah theiya, chule achebea ahile asuhkhen thei ahin, chate chu avangse hiji ahiye. Hijeh chun nunbol sangin ngailu jon tina ahi, ajeh chu nu-le-pa kikhah a athoibit pen chu hiche ngailutna chu ahi.

Chate chungang hi Pate hon achekhelnauva apho dinghi hi Bible thuhil ahi. Amavang hiche phona hi amun le aphaat a sumseltah a manchah ngaiya ahi. Eiholah a kihilna sangang kiphona atamjoa ichepi jeh un chate hi alungu aneo gam tan ahi. Mizoram a kaum sunga kathil mudoh khat chu, chapangho itobanga amitmo vang uva apho nau kahe khapon ahi. Amongin, kiphona sangang kitil khouna hin chapang te asuh hat joh uva, alunglet sah u ahi. Ikipho beh seh teng leh aphaatna sangang asetna lam joh soh ji ahitai. Hiti ho jeh in, mipate in aji le achachungang amopohnau apoimo lleh jenge. Inchen akhan ahilou le akheh suh chu mipaten amopohna itobanga ching thei tah le kitah tah a amanchah em ti chungang akingame. Lunglut tah a sim jouse chungang Pathen vangpeh chang taken.

"Beat Air Pollution"

Host Country: China.



*Henkholen Kipgen
Development Coordinator*

SERMON

World Environment Day World Environment day hi Environment day, Eco Day chule achomlam'in WED in akihei, Vannoi pumpin 5th june nikho hi thupi tah'in Annual events khat in akinit ji'e. KBC injong environment awareness hi KBC houbung jouse le khosung jousen anei thei nadin anikho chet in mang jou hihjongleh kumseh in June 2nd Sunday nikho hi World Environment Day nikho in imang jiu'vin chule KBC Event Calender injong ikoi jiu've. Kumseh United Nation General Assembly in Theme le Slogan asemjin Tukum 2019 WED Theme adia kitem chu "Beat Air Pollution".

Environment hi ipiham:

Environment hi Eipao 'a seidin Pathen in asemsa chule eipeh'u ikivah nadiu le ihinnadiu va ahinading bang tah'a thil chikim ahingthei le ahinglou ahivang'a mihing'a dia thil khoh tah tah

ikom ivel a aumjouse hi eiho'a dia Environment ahi. Vetsah na'in Leiset, Hui(oxygen), Thingphung, Song, Tui, Nisa, Sa le Nga, Vadung, Tuikhanglen, Mol etc, Achung'a kisei hojouse hi mihem'a dia angaicha ngen

ahi. Vangset umtah'in mihem kiloset nale pathen'in eipeh'u thilho ngailut'na beihel'a imoh suhmang mang jeh uhin ichen-nao leiset hi til to abang tapon, kikhelna akumseh in akimupan tan,asesa ho ijo kham kham uva isemhoi kit lou ule hahsatna tampi imakho uva ihin tobe diu ahi.

World Environment Day(WED) History

World Environment Day(WED) hi 5th to 16th June 1972 kum'a United Nation General Assembly le United Nation Environment Programme(UNEP) in United Nation Headquarter mun'a Conference aneikhom hon na'a kon'a hung kiphut doh ahi. Amasa pen din 5th june 1973 kum'in vannoi pumpi'a khopi len jouse'a anakimang pan'in, Theme masapen chu "Leiset Khat Bou Seh" ahi,

Epi ding'a World Environment Day init uham?

WED hung kipat dohna pipen chu Neh le chah hahsatna, Akum kum'a Gammang kisumang, leiset akum kum'a sacheh cheh, Hui thenglou pung cheh cheh, Kumseh'a Tuikhanglen (1990s Report 2.9 Milimetre/0.11 inch. 2018 Report 3.4 millimeters) a sang cheh cheh, hiche ho semphat/suhtang nading'a WED hung kiphut doh ahin, Hiche nikho init lo'na pipen uchu:

1.Mijousen achung'a kisei tijat umtah Environment issue hohi

awareness anei cheh nadiu.

2.Mijousen Awareness inei naban'uva ijokham kham'uva iti pan ilah uva asesa hohi isemphat diuham.

3.Ichen nao ikom ivel'a um Thing, Song, Tui, Ganhing hojouse hi amangthei ahin,venbit nading'a pan ilah cheh nadiu.

4. Itileh ikom ivel/igam sung uhi anen aboh akisumang in theng tah in mijouse aki'um thei dem. World Environment day nikho'a thil kibol ho.

Mi tampin anikho masang'a kipat in kigot na thupi tah anei jiu'e, mijousen pan alah nom nadiule anikho kiman lona pipen ahethethi nadiu'vin News Channels honjong pan nasa tah ala jiu've, Newspaper injong mipi hetthei nading in Environment issues, iti isemhoi diu ham chule iti pan ilah khom uva inopsah nadiu lampi hojong article hoitah tah ahin pe'e. National le International level injong Banner a thucheng hoitah tah kijih in Khopi sung'a Rallies achejiu've, Veng sung'a thilnen kipaithang ho suhtheng na nikho injong akimang'in, hiche nikho nile simlai chapang ho Environment issues ho ahethet cheh nadiu'in Drawing/Painting chule essay competition school level injong akibol ji'e. Chule hiche nikho ni'a akibol hoitah khat chu School, Ngo's, Social Workers, Govt, Dept officers chule milen milal ho-

jousen jong thingkeh mun'ong lai ho'a thingkeh aphut jiu'e.

2019 World Environment Day Theme: Beat Air Pollution.

Mihem a dia angaicha(Need) thil tampi aum'in, hinla mihem te a dia angaicha thupi pen le achung nung pen hi Hui(Air) ahi. Mihem neh le chah(Food) bei'in jong Hapta thum(3 Weeks) akihing thei in, Tui(Water) bei in jong Ni thum(3 Days) akihing thei nai hinla Hui bei'in mihem asao pen in Minutes thum(3Minutes) akihing thei e.

A. Hui(Air) hi epiham?

Nitrogen, oxygen, carbon dioxide hicheng thum akigop khom leh hui(Air) akisem doh in, Nitrogen leh oxygen hi mihem a dia angaicha ahin, carbon dioxide hi hui lah'a apan vang'in mihem a dia apha chom poi.

B. Hui(Air/Oxygen) hi hoi a hung kon doh ham?

Thingphung(Plants & Trees) akan in oxygen akimun, Mihem chihnan oxygen jong semdoh'in aum'in, hiche mihem chih'na a kon'a kistem doh oxygen hi Hospital le adang dang'a manchah in aum'e.

Mihem te adia angaicha pen hui(Air/Oxygen) hi mihem in eti asuhset ham!

1.A. Factory & Industries: Mihem khantou nadung jui'in akum kum in Factory le industries apun be be in. hiche Factory le industries

sahdoh nadin gammang jong aki vat ngim'in inn sahna in akinei tai. Factory le industries akon'in mihem in kivah naleh sumhol nan akinei in, khantou nalam a imachal jing naove, hinlah khonung ding ivet sao levang Factory le industries inei hou hin eiho tahsa damthei nale hinsot na asu mang in ahi, ajeh chu Factory le industries jousen Hui thenglou(Smoke/Pollution) le Thil nen(Waste Product) hatah in apunbe sah'in natna tampi jong eisem doh peh taovin ahi.

1. B. Plastic paithang: WED 2018 Theme hi "Beat Plastic Pollution" Mihem a dia plastic(Polythene) hi niseh a angaicha khat ahin, plastic akipai thang jeh in igamsung'u then'na lam'a aki lhasam'in chule igamsung'u kidah/vetset in aum'e. Plastic hi mihem a dia thil poi'mo tah ahivang'in mihem adia manthah'na khat jong ahi. Plastic hi thil dang bang in amoh mon jou pon amon nadin kum sot tah alut'e. vetsah na'in plastic Bottle kipasi thang hohi amon nading in kum 450 alut'in chule plastic bag mon'na ding'in kum 1000 alut'e. plastic kipasi thang namun'a leiset fertility asumang'e, ajeh chu plastic kistem na'a hin chemical apang'in hiche hi leiset toh akimat phat leh poisonous chemical ahin semdoh in, hiche hin leiset ahoi nale apha'na hatah in asumang ji'e. Plastic mei'a kihal jong hi apha'na aum deh poi,

plastic a kon'a akhu(smoke) hung doh hin mihem tahsa hatah'in asukhan ahi. plastic akhu hi mihem tahsa bou asukha pon Green house Gases apun be sah'in, leiset temperature hi asan sah cheh cheh e. hetding le juiding'a pha chu plastic akiman jou leh suhtheng sel'a kitup tah'a koiding manchah nanom phat leh mankitding. Plastic hi ahithe i chan a hallhah lou'a manchah nathei chom chom a manding apha i. Plastic paithang jeh'in thilnen apungbe be'in, then'nale damthei na asumang e.

1. C.Gammang(Forest) ki-sumang: Mihem adia forest hi a ngai khoh pen khat ahi, ajeh chu ihinnao hui(oxygen) hi thingphung akon'a ahin, thingphung etam phuh(cut/destroy)chan uva oxygen lhom cheh cheh ding ahi. thingphung tamlou na'a tuijong ahah in ajeh chu thingphung ajung in tui achop in chule tui akhol thei e, thingphung in leiset atuh det'in landslide/mudslide aveng bit e. Mihem'a dia Thingphung phatchom nahi seijoulou ahin hinla kumseh in mihem in thingphung akisunmang cheh cheh e. Kumkhat sung a vannoi pumpi'a thingphung/Forest kisumang jat hi estimate akibolleh Approx 77,327 Sq. Miles ahi, aletdan hetthei nadin Manipur letdan hi 22,327 Sq Km bou ahin chuti'a ahileh vannoi pumpi'a mihem in kumkhat sung'a forest

kisumang hi Manipur letdan jat 10 val lenjo hi akisumang ji ahi. Hiche rate a ichejom jinguleh forest mang cheh cheh ding a consequence chu Huitheng lhasam ding, ichen nao leiset sacheh cheh cheh ding, tui hah cheh cheh ding, tu'a sang'a hahsat na, dammo na, thina jatchom chom ihin to diu ahi.

2.Gammang hung kah lona ajeh veohite:

A) Gamgot lai phatle kolphe (Lightning) akon'in gammei akathe i e.


B).Churup(Cigerate) chep ho kitup loujeh a. C). Gamsa tha nathei dia. D). Muchi tu nadia kihal. E). Bong le loi vah hon hampa phat nadia ahal. F). Ajeh beihel'a boldi hetlou manle engset jeh'a gamhal jong aum'e. Tunia igelphat diuva dei umchu gammang ihal phat uleh imulou'u ganhing chikim ihallih thao ahi, chubanhing thingkeh, thingphung kum sotpi lut'a hung khang doh imacha louhel'a isuh mang tha'u ahi.

3.Gammang kihal lha leh kisumang hin epi ase(effect) mihem a'dia aso do hem?

Amasa pen'a ihetdiu'va dei umchu thingphung(Forest) isuh mang teng uleh ihin'nao oxygen hung kondoh najong isuh mang thao ahi. Gammang ihal teng uleh hui phalou(Smoke/Carbon dioxide) hi hatah'a ipun be sah uvin, hiche carbon dioxide hi vanchung(atmosphere) a

akikhol'in leiset temperature hi hatah'in asan sah in ahi. Noi ja hi Leiset temperature akhan dan veohite.

(Rise of Earth Temperature per decade in Celsius & Fahrenheit)



Achung'a leiset temperature umdan hi ivet leh kumseh in temperature level hi akal jing'in, hiche rate a akal hi mihem tedia hahsat na punbe na aso doh'e, eihon kikkham(stop) jou hih jong leh akhan na rate/level hi ichan ham a isuh lhom thei u ahi.

Christian perspective of Environment: Christian ten itah san uhi leiset le asung'a um chikim(ahingthei le ahing lou) jouse hi pathen thilsem ahin, athil sem kidang simjoulou holah'a ama limle mel'a ahin sem mihem hi angai sang penahi. Gen 1:28-30 veleo hen, Pathen in mihem asemjou in phatthei aboh'in asemsa leiset chung'a umjouse

chung'a thunei na apen ahi, hiche thunei na hi mihem in angaichat dungjui le kihinso na'a aman-chah nading'a apeh ahi. Tunia igeldia dei'um chu Pathen thilpeh hojouse hi kitup tah le ingaichat dungjui'a iman chah uhinam? Ahiloulah Pathen thilsem ho suse joh'a ipan u hitam! Ichennao leiset hi masanglai a lungmong tahleh kipahtah'a ichennao leiset chu ahijou tapoi'thilsoh kidang dang akum kum in muthei in asoh e, hiche hi ahi nading bang'a thil aum tah lou jeh'a hung soh-doh ahi, avai gei masang'a ibon uva kitoh tahle lungkhat keng'a ichennao leiset ikisemphat phat angaitai.

PHATTHEI CHANNA MIPA

Genesis 12:1-3

Rev. Kaikam Chongloi

Sermon

Pathenin phatthei boh din eikou uve chule eiho a konin namdang/midang jong phatthei aboh nom e.

Pathen thangvah in umta hen. Eikou naova hin phattheina toh ajao tha'n ahi, ahin khatvei khatvei teng le hin kouna le phattheina hi hah-satna, boina umjeng jong leh hiche thusim phabeh khat bou ahi e. If we bottle up God's blessings for ourselves, we are missing the reason He calls us. Aman eikou uva phatthei eiboh nau hi, ajeh chu eiho jong midang ho adia phatthei channa (channel of blessing) ahithe na ding ahi e. Pathen lhentum te, phat kilemtah inei uve, Pathen phatthei bohte, ihinao hin mopohna lentah (Great responsibility) inei uve, midang, namdang vannoiya aum jouse chung nga.

Verse 1-3: Pathenna konin thupuh aum in ahi (Go forth) malam non tihin kitepna (promise)³ toh ahophan ahi.

Nam lentah kaso ding nahi
Phatthei kaboh ding nahi e
Na min kaki thansah ding nahi
chule thupuh nina chun (future tense) "Be a blessing" phatthei bohding atin, hichun kitepna (promise) thumin ajui than ahi.
Phatthei naboh te chu phatthei kaboh ding ahi.

Na gaosap te chu ka gaosap ding
Nangma jeh a leiset chung

phung namkim phatthei chang ding ahieve.

OUR GREAT PRIVILEGE: God call us to bless us. Pathenin phatthei boh dia eikou uhi mivangpha tah ihieve.

Huhhingna hi Pathenna kon ahi. Pathenin Abraham Ur gam a konna akoudoh a hinkho thah lampi ajot sah hi, ivetle eiho jong ihin kho lui aphalou chengse pailah a hinkho thah lampi Pakai lampi jotdin eidei uve.

God's call (Pathen kouna)
Pathen kouna chu thunei na toh

ahungtha in ahi. Abraham Ca-
naan gam a konna na che nom
leh chen ati pon ahi. Ahinlah,
nagam sung, na inko, naphung
nachang, na insung dalhan lang
keiman vetsah dinga kagotna
gam chu jon tan.

God's call often requires difficulty.
Pathen mikouna hin hahsatna to
jong aumtha ji e. Pathenin Abra-
ham akou chun bailam taha gah
moh jot jing thei amoh hipon
ahi. Abraham chu kum 75 alhing
tan, Ur gamma a inko, asopi, ag-
amsung mite toh hoitah a khosa
ding ahi tan ahi.

God's call requires faith in God
and His Word. Pathen kouna
in angaichat chu Pathen tah-
san ding chule athu nit/jui ding
(12:4-9). Abrahamin Pathenin ak-
ouna chu atahsan jingin, ajuj jing
e. Pathenin akouna chu atahsan
na juite chung a kitepna asumil
ngaipoi. Pathenin Abraham jah
a "I will show you the Land, I will
make you a great nation, I will
bless you, I will bless those who
bless you".

Pathen Phatthei bohna (God's
blessing)

Hilai ja Pathen thupeh masapen
hi, akitepna thumin ajuithan ahi.
Khatna: Pathenin Abraham nam
lentah khat nin asemдох e. Ama
phat laijin lhung hih jong le Jew-
ish nation din Abraham hi Apau
(Father) khat ahi tai. Chujong leh

Pathenin ason achilhah te din Ca-
naan gam ape tai.

Ani nan: Pathenin Abraham phat-
thei boh din akitem e. Tahsa le
lhagao lam in phatthei boh in
aumin, aki thansah e.

Athum na: Nang jeh a vannoi lei-
set na um mihem cheng jouse
phatthei kaboh ding ahi.

Imophonao lenpen

Pathenin in ikounao ajeh chu
eiho a konin vannoi nam mite
phatthei achan nom e. "I will
bless you.....and so you shall
be a blessing (Gal 3:7,9). We are
under obligation not to bottle
up the promise, but to take it to
every people group on this earth.
Il Kings chu ivet leh Samaria, the
capital of the northern kingdom
chu Aram lengpa Benhadah in a
um kimvel tan ahi. Thilsoh ho chu
agimnei lleh jeng tan ahi. Nupi
ni in acha lhon kitha a kihinso
na dia neh ding ati lhon tan ahi.
Chule khopi kelkot pamlam ma
chun mipah li (4) khutdo aum in
ahi, ama ho jong kel jeh in thid-
ing in aum tan ahi. Galmi te camp
langa chun thi le thi tin ache tau-
vin ahileh kidangtah in galmi te
chu khatcha ana um tapon ahi.
Oi vaset nin ane uvin, thil adei dei
u akilah uvin, achainan Samaria
khopia lut uhitin, phatthei ichan
nahou miho jong chanthei nadin
seiju hite akiti uve. (II King 7:9)



Pentecost

Acts 2:1-13

*Rev Henjalen Doungel
Mission Secretary*

Sermon

Introduction: Pentecost kiti hi Greek te paova 50 tina ahin kalchuh kut jouva ni 50 lhini ni tina ahi. Christian te adia Easter Sunday jouva pat choldo ni hapta 7 lhini Pathen in vana kona Lhagaotheng ahin sol nikho chu ahi. Juda te dinga Pentecost ni hi kalchuh kut ni jouva pat ni 50 lhini ga khoptup nikho ahin chule Mount Sinai a Pathenin lekha butheng Torah ahin peh nao nikho chu hetjing na a aman jing u chu ahi.

Lhagaotheng hung kumnadinga nikho kilem. Pentecost ni hi Judate kum khat sunga Jerusalem a thumvei acheova Houinn sunga thilpeh choia Pathen agalhai nao nikho ho laha khat ahi. Hiche ni a hi Judate muntin gamtin a kon hung jiuva Pathen lhaidinga Jerusalem a hung khom ji ahijehun khopisunga mitam nipen phatkhat chu ahiji. Hiche nikho a hi Peter thusei ajahu va kon leh thilsoh umchan amuuva kona mihem 3000 in Pathen atahsan uva Rome gamsung sea chelea Pathen thupha lhangsam dinga pot paingal ana hiuve. Jesu Christan Jerusalem dalha hihun ati chun sei-

jui ho chu analung dong lhez un te. Apakai pao kitha jouva kicha pum puma Jerusalema aum uchu tijat nale kichat nan anadim unte. Ahin Pentecost nikho a Lhagaotheng ahung kibuhliah chun ipijeh a asei ham ti hethem taovin te. Pathen phat gon hi phat gom kom ahijing e. Pathen in phat atol khel ngai poi. Pentecost nia thilsoh kidang thumho:

1. Huipi hattah nungin (Acts 2:2)
Thilsem jouse chungu thunei le vaihom Pathen ahi. Mihem ten ahithe talou dinga agel jong Pathen in pha asah leh ahimo aumpoi. Hilai muna hi huipi nungin ginga ahin hinlah huipi nunga ahipoi, Hui kiti hi bible a Lhagaotheng vetsah na ahin huipi hattah nun gin kiti hi Lhagaotheng chu ginglem luma pilhing taha hung ahi tina ahi.

2. Leilima meikong: Hiche a meikong kiti hi mihemten iman chah u meihi ahipoi. Pathen loup i kiphon na meijoh ahi. Hiche leilim mipi jouse chung a achuh hin avet-sah chu Lhagaotheng natoh hi mi-jouse chung a chuthei ahi tina ahi. Meikong a kon hetthei khat chu meisi pah khat in gampumpi kah-vam nathei tha anei banga Lhagao natoh hin vannoi pumpi akikhel sah thei ahi ti photchet na ahi. Philip jong chu Lhagaotheng adim phat in Samaria khopi a achen khopi pumpi lhagao kipa na thupha ana sei peh jou vin ahi.

Old Testament ahin meihi Pathen miumpi kihet na anahi. Pathen in Moses akimupi chun meikong in akihou lim pin ahi. Isreal chate Egypt akon ahung kitol doh u chun sunle meilhangin apuijin janle meikong in anapui jin ahi. Elijah chu Pathen in meija kitem sakol kangtalai jin alatou ve. Dan thupeh som Sinai molla Pathen in apeh chun mei lom in molchung chu atom in ahi.

Paochom tho Acts 2:4. Hiche lai muna mijouse Lhagao chan kiti hi kidang tah ahi. Old Testament lam ivetleh Pathenin amite hetsah nom aneiteng themgao hokoma ahetsah jin chuteng themgao hochun hichu mipi te anasei peh son jiu ahi. Bible a thempu/themgao ho lhagao chandan chu Elisha chu Elijah sangin Lhagao ahachan joi. Thempu Aron chu Lhagaotheng akon Thempudin thenso na achang in, chule David chu leng-

din lhagaovin then so na achang in ahi. Hitichun miho chu khat khat lhagao achan thu u anakisei jin ahin mitampi chung a khatvei pansa a Lhagaokibuh lhah kiti hi Pentecost nikho tilou nidang in ana umkha pon ahi. Hiche nikho a hi Pathen chu ahouten Lhagaole Thutah a ahouding mong ahi kiti hung kipat na ahitai.

Joel 2 akon kilason Acts 2:17-18 a Pathen in keiman mihem tahsaa hing ho jouse chung a kalhagao kabuhliah ding, nachateu pasal jouse leh numei jousen jong Gaothu aseidoh uva namiteu upa tehse honjong mang aneidiu nagollhang jouseo vin jong themgao thilmu banga thil amu diu ahi tin Pathen thutheng in ase in ahi. Hichu guilhung a ahitai.

Pathen in Achapa thisan in amite jouse eisop theng tao vin ahi. Houbung pumpi hi bible dungjuia ivet leh lhagao va haljing ahi angai e. Leilima a meikong hung kibung lha Lhagaotheng natoh chun tunia tahsan chate jouse eisuhhat uva Pathen thupha lhangsam dinga nganse na eineiu ahi.

Pentecost nin Peter in Pathen lhatdam na thu anasei jin ahileh Lhagaotheng natoh na akon mipiten ama gampao cheh in anakijah un chuche nile lechun mihem 3000 valin Christa akisan taovin ahi. Mitam tah in Pathen thu seiphong nading a hi lhagao pao angai jeha Pathen in hiche nia hi lhagao abuhliah ahi atijeove. Ahin hichu ahidehpoi. Peter in Pathen

thu aseichu amapao va asei ahin ajahon amagam pao cheh a ajah johu ahi. Hetdia deium chu Pentecost nikho a Pathen in vana kona Lhagao theng ahin buhlhah a pao athou chu mipi hetthei paocheng ahi.

3. Mipin Lhagao hung kipe apom danu: Hiche phat laia hi muntina kithecheh jews te chu Jerusalem a Pentecost kut mang dinga hung ahivu. Acts 2:9-11 chu ivetleh ahung kikhom ho chu Parthia mi, Medi mi, Elam mi, Crete mi le Arab gam mi paochom thocheh ahivu. Imuthei uchu Pathen thutheng kithe cheh nading a hi Pathenin gam 12 akon mite Jerusalem a ahin puikhom ahi. Gam somle ni lama kon hung kikhom mite chun Lhagaotheng natoh thilsoh chu agamcheh uva aphonjal uva Pathen huhhing na thupha chu anasap phong leo ahitai. Ajeh chu amaho hi Lhagao va dim ahitaovin imacha koimachan tingjou talou ahi.

Pentecost ni thilsoh chu mipi laha kon pomdan ni aume.

Miphabep chun Lhagaotheng hung kipe chu ahethem un akisan taove. Hiche Lhagaotheng thilbol nachun achonset nao akiketchet sah in lungkisih pumin Peter kom ahin belun ahi. Amaho chun thilsoh chu kicheh tah a ahethem lou vang un hetnom nale juinom na lungthim aneion ahi. Hiejeh a chu Peter in Pathen thu ahin sei a chu alung thim sungu tenga kidot banga keha

sochat nalampi ahin hol u ahi. Keihon ipi kabol dinga hitam tia Peter anadoh uva Baptist achan uva kon Lhatdam na anachanguva Pentecost nichu amaho dinga Lhagao kihin so nikho anahi ahi.

Miloi khat kit chun thilsoh chu amuvn ahinlah ahethem thei tapouve. Lhagao changho umchan chu totnop nan amang un jukham ana hisah jotaove. Koiho tabang chun Lhagao natoh ahethem a koiho chun ahethem lou ahitadem? Pathen in mihem ahin manchah ding teng achih jehleh atep jeh in amang pon alungthim thengho chu amang cha ji. Amachu mimol tah hihen minemnung tah hijong leh hitabang michu Pathen in adopsang ji ahi. Miching tah jong chu alungthim athen louleh Pathen in amang cha poi.

Conclusion: Hiche nikho a Lhagao chang ho hethem lou va nuisat ho chu mi ijat ahitadem? Mi 3000 Pathen a dia ahinna hinpedoh ho lah a chun ajaodem ajaohih dem tivang isei thei tapouve. Ahin hiche thilsoh akon ihet thei uchu Tonsot hinna neithe nadia mijouse chu Pathen in chance apeh cheh ahi. Lhagaotheng natoh jouse amucheh u ahin tahsana sanding le sanlou ding jong amaho khuta kingam ahi. Pathen in eiho jouse jong chanvou eipe cheh uve. Jesu Christa Pathen le aLengpa a kisan chan chu Pentecost nia Lhagaotheng hung kumlha chun ichunguva na tongin tin Pathen to eikimuto sah dinga ahi.

MOL CHONDOH JOUNA T A H S A N

Mat. 17:20,

(Rev. M. Haokhothong)

Sermon

"Tahsanna ankam mute neijong leu chun, hiche molsang jah a hin, hikoma konin khu kichonin, tijong leu chun kichon jeng ding ahin, imacha bolmo nanei lou diu ahi" tin Jesun anasei-e. Ajipan numei chom akichenpi tah jeh in kanaonu chu ajipan ana dalhai. Hijeh chun kanaonu hi ama kithat din (suicide) thumvei ana kipan jeng tan ahile ken kidang kanasai, tin pasal khat in ana sei-e. Kanaonu chun, *"Kathoh na hi mol lentah khat a kaltou ding kabang jengin, hijeh chun kitha chu bai jonte tin kagelle"* tin ana sei-e, ati. Tulai hin, vannoi a mi tamtah hitobang pohgih poa aume. America a khangthah te lah a, kum khat sunga mi lakh 6 banghi, ama kithat go ahi jiuve. Hicheng ho lah a chun mi 6,000 vel vang akithat jiuve.

Hahsatna thoh, pohgih pohna hi mol lentah toh tekah thei ahi monge. Mol ho jong alen aneo aum bangin, lungdon lungjinna jong alen aneo aum jie. Athoh dan hi ami mi chung akingame. Mount Everest tia kihe vannoi a molsang pen hi foot 29,028 sang ahi. Ichana sanga ham ti nagel theilouva ahileh Indan asang, dan 1,933 khat ngaiton, hichana chu sanga ahi. Nalung a kaltou dia nagel napoh gih chu hichan vela asana ahi tengle chun gihmong ahitai. Pohgih hi athil chu gih-a hilouva eima lunggela gih kisa chu agihna ahijoi.

Mat. 17:20 a kisei hi, seijui hon iti dana satan anodoh joulou hia ham, ti thudol a Jesun adonbutna ahi. "Jesun, natahsan lhom jeh-u ahi, tahbeh a kasei peh nahiuve, tahsanna ankam mu te neijong leu chun, hiche molsang jah a hin, hikoma konin khukoma kichonin, tijong leu chun kichon ding ahin, imacha bolmo nanei lou diu ahi" tin, seijuite

henga ana sei-e.

1. Ankam mute tahsanna: Tahsanna neocha ngaichat ahi. Thil lentah chondoh theina dia ankam mute tahsanna bou ngai ahi. Hahsan tem ! Hahponte. Mount Everest tebeb hahsatna pohgih khat tolmang jouna din tahsanna neocha ankam mute khat angai-e, tia Jesun ase i ahi. Tahsanna lentah neijou koi jong umponte. Gollhang dehchet David in mihatpa foot 9 jen sangpa Goliath atha jou chu gel temin. Atha lhom theilou tahsanna anei jeh ahin, hijeh chun David in Goliath henga, "Keito kisasat dia chemjam le tengcha, chule tenglung thoa hungkon nahin, keivang natai tomtom jeng hat chungnung Pakai, Israel sepaite Pathen mina nangto kisasat dia hungkon kahi. Tuni mong monga Pakai in nang kajona ding tha eipeh a, kajo teng nalu katan ding ahi" anati.

David in Goliath chu songbom le songchang khat seh in, athat tai.

Tahsanna hi ahat monge. Eiho jong pohgih ipoh tengule David tobang ihuue. Jesu mina, ipohgih hou chu ijo diu ahi. Hiejeh chun Jesu tahsan hi pohgih jona ahi ti geldoh jing ute.

2. Genthei hahsatna pohgih : Genthei hahsatna pohgih jouse jona thei tahsan a kona thahatna inei thei cheh uve. Lunglha poute. Ipohgih-u chu Mount Everest bangin sang lelul jongle ijo diu ahi. Tahsan hi thanei tah ahi. La tampi semnu Fanny J. Crosby kitinu hi hapta get ahi jouvin, amit pumthop in ana thop-e. Hichu amanu dia Mount Everest ahi. Ahinkho sunga akhomu lou ding chu gel hen lang lunggimpi pile thiloi thei anahi. Ahinla amanu hi athohje ana kithem chuh in, Mount Everest a chun atahsanna ankam mu chu anautui. Kho amulou vangin Pathen phatna leh loupina ho amuthei jinge. Hiti chun Pathen vahchoina la 8,000 ana sundoh manchai in ahi. Ama la semho eiho labua tampi aumin, ikikhop tengule hou-in a isakhom jiuve. Alasem isah hou lah-a melchih thei chu, O iti nop tam, Christa kanei (Blessed assurance Jesus in mine), Ka leiset hinkho abei teng (Save by grace), Pathen thil kidang bol (To God be the glory), kiti laho hi ahi.

3. Pohgih jansah jouna: Pohgih hi eihon ijo-uva, ama kijo sah lou ding ahi. Psychology in agih dan hi 10% ahin, ipohlel danu hi 90% ahi, ati. Atina chu, eihon isuhgih-u ahijoi, ati ahi. Jesu seidana hi ivet leh, tahsan vanga mol lentah imasanga um chu chondoh thei ahi, ati ahi.

Pathen tahsan mi din, boina thilgih hi boipi ngailou bangin aum jie. Ajeh chu boina hahsatna lah-a ama tahsanna chu athisa hilouva, ahing jing tahsan ahi jeh ahi. Chapang ho tahsan hi nen lou tahsan ahin, milen hon ima khat atahsan jiu vangin agingcha mang jipouvin ahi jie. Pakai Jesun, "Chapang ho chu kahenga hinsolun, jada hih un, ijeh inem itile vana lenggam chu, amaho tobangte bou chang diu ahi" (Mt.19:14), anati. Eiho tahsan jong chapang a bangin hatleh, 'kasunga um thaneipa hi leiset a um thanei tahpa sangin ahat-joi' tia isei thei diu ahi (1 John 4:4).

Jesu amat niu jan chun, Peter in seijui dangho chemang jongle Jesu nung anajui in, atahsanna chu ankam mu khat sanga lenjo danin agelin akisongin, ahinla thumvei Jesu ana seilep jenge. Katahsanna hi alhome, tia igel lai chan seuva, kisona neilou lhagaova vaicha ihu ahin, hiejeh chun ikihabol jingun, itahsanna ahatna din panpina Jesu henga ithumui. Mt. 5:3 in, "Lhagaova chimtih neilou ho anunnomui, vana lenggam chu amahoa ahi" ati. Lhagaova chimtih neilou, lhagaova kisonglel jingho, lhagaova vaichaa kigel jing ho chu atahsanu ahatna dia kihabol jingho ahin, hichu Pathen dei ahi. Lhagaova lhasam kisaho chun Pathen ahahol jiuve. Lhagaova vaicha kisa ho chu ama tha-in akisong pon, abol theina hoa jong akisong pon, Pathen kithopina athum jingui. Hitia abolu chu Pathen dei ahi (Zechariah 4:6). Pathen itahsan cheh chehna diuvin kihabol jinguo hite.

Mission Column

Mission Conference munding levelling kibolta.

Ahung lhung ding Mission Conference 2019 kiman nadingin Kangui Christian College campus levelling akibol chai tai. Kipa um tah chu nikhat JCB kiman na nikhotha chu Pu Tongkhohao kipgen Member Finance Comittee KBC in Convention kithopi na a manbeia eitoh pehu ahi. Go le dai kaijeh in nithum lam analut in tunvang mipi kitit nading kham lhingset nin level akibol doh tan hongphal tah a a machine hintoh doh Pu Tongkhohao Kipgen chung a kipa thu akiseije. Chule hichan natoh na a pan hinla Kpi Centre Church Pastor, COLA Chairman, Secretary chule member atoh khom pihou jouse chung a jong kipa thu sangtahn akiseije. Pathen in athil pha bolnao chung a phatthei boh jing taohen.

Hetdia pha chu hiche lai muna hi ahung lhung ding 14-17 November 2019 sung a Convention Mission Conference kibolding ahin alohin thei nadin itaonao vah anagel doh jingu hite.

KBC North India Mission field hondoh hita.

Achesa 1-7 May 2019 sung chun Kuki Baptist Convention Mission in North India Mission Field hondoh na agakinei tan ahi. Hiche program lading chun Rev Dr Thongkhosei Haokip Gen. secretary, Rev Letlal Haokip KBC Mission Liaison Officer, Rev Henjalen Doungei Mission Secretary, Pu Haopu Singit Board Member chule Pastor Gen Samte



Assistant Pastor Journey Church New Delhi agakikal song in ahi. Hiche Field phondoh na program chu Rev Letlal Haokip in conduct abolin, Pastor Gen Samte in worship alamkai jin Rev Henjalen Doun-gel in KBC North India Mission introduced abolin chule Rev Dr Thongkhosei Haokip in tahsan chate Pathen thua tilkhoh nale North India Mission Field hondoh na Apa Acha chule Lhagaotheng Pathen minin 3rd May 2019 ni jinglam 11:00 am in phondoh na ananei tan ahi. Mipi ankong sokhom na akinei jin hichu Pastor Amit le insung miten apodoh un ahi.



Hiche program tohdoh nading a hin Rev Letlel Haokip KBC Mission Liaison officer pu pan lah na alene. Aman agari ahinpodoh a Delhi a pat Jalandhar Punjab chan anakikal song e.

Pastor Gen Samte jong hiche programm a hin kipah tah in ahung pangin aman program sunga a vahchoi na lasah alamkaijin kiman chah anom lkeh in ahi.

Pu Haopu Singsit in kipah tah in kiman chah nasung le program dang dang ho media coverage eibolpeh un anikho a nakitong ho jouse houbung mipite jouse hetthei din eitahlang peh un achung aikipa nao alene.

Rev Dr Thongkhosei Haokip General Secretary KBC in aphant bichin lkeh jong leh ahinkaikeh a Convention Mission gelkhoh na jalla ahung kalson a North India Mission field hondoh nale thenso na eibolpeh je-hun achunga kipa thu sangtah iphongun ahi.

Hiche Mission field hi alohlin thei jing nadin houbung mitheng ten itaona vah geldoh jing u hite. Tule tua hi Pastor Amit Sandiala in avet sui ahin, tomngai tah a pang a Fellowship mun ni inanei naova kon tua hi mun chom choma fellowship mun 5 ahong doh tai. Alohin jing nadin itaonao vah geldoh jingu hite. Pathen in KBC North India Mission field phatthei boh jing taken.

Saijang Mission School foundation Stone kitung doh ta.

Achesa nisim 9 May 2019 nichun Saijang khosung Karbi Anglong As-sam a " Baptist Mission School" foundation stone Rev Dr Solomon Rongpi General secretary CBCNEI in tundoh nale thenso na ana neitan ahi. Ama ahoulim na a Karbi Anglong gamsunga agammite education gelkhoh na jalla school hin gong KBC chung akipathu aseijin agamkai mipi ten kipah tah le lung khat tah a atosot cheh diu adeisah na aphong doh in ahi.

Rev Davidson General Secretary karbi Baptist Convention injong houlimna anei jin chule Pu Tongthang Touthang KNA President in jong nakitong chung akipa na phondoh na anei jin ahi. Chule Pu Demthang Kipgen Saijang Haosapu in jong KBC in akhosunga School bolding tohgon aneina chung akipa nale akinep na aphongdoh in ahi.

KBC Gambih no 18 Pastor Seiminlen Haokip le lamkai atohkhom piho tomngaitah a pan lah jallin lolhing tahin Program anakitong doh in achung uva kipa thu sang tah iphong un ahi.

Hiche School hi KBC Mission in Education lamto kisaia school abol amasa pen hiding ahin ahung lolhin a chate hinkho tahsa le lhagaova semphat ahithe i nadin Pathen henga taonan lhutjingu hite. Tukum sunga School inding sah doh a khovei 2020 apat school hi bol pat ding ti tohgon kinei ahi.

Cambodia Mission Ministry Report

Amasapenin houbung miteho jouse Pakai min in chibai.

Neitaopeh naojallin Cambodia gam a Pathen leng gam na itoh nao akimachal jingin ahi.



Achesa April Iha sungin khmai Nungah mi thum in Pakai Jesu tahsan le Kisan na anei utoh Ihonin Baptist pastor *J.Lalduhawma* in tuilut

sah na ananeijin ahi. Atahsan thah ho tahsan akhan nadingle atahsan loulai hodin taopeh jingu hite.

Chuban a *school ministry* jong May lha a akipanin chapang 30 tobang ahungpan in ahi. Hiche school ministry a hin school a dinga ngaichat hi desk, chair le fan hi nasatah in ngaichat be ahi. Agam hi gamsatah ahin 40°- 42° Chan a sa ahin phalbi umlou nagam ahi. School chapangho hi devotion kineipi a Pathen thu le la kihila lekha hil toh, kikop a chingthei tah a kipui hoi ahi.



Chubankit a *Sunday school ministry* jong hi taona thahat jallin akimachal jingin ahi. Christian hilou chapangho kipuikhom a English gospel chorus le action song kihil a chuleh amaho pao a Bible story kihil a chujou le nehthei kihop peh a kilesolji ahi. Hichi chapangho lungsunga Pathen thu kitulut hohin ga ahinso nadin taopeh jingu hite.

Pathen lungset najalin maylha tarik 21 apat in 24 chan *Asia Pacific Baptist Youth Conference Philipines* a kagajao in damsel chan aki-chai theijin ahi.

Conference thupi chu ahile *make and multiple disciples* ti ahin nasatah in kaphat chompi in chule keijadin athah tah in lhagao kisuh-hal na khat in jong apangin nasatah in kakipah in ahi. Chedinga eihin phalpeh lamkaite chung a jong kakipah in ahi.

Keima jong tahsa veise tah in ka umjingin hijongle neitaopeh nahou jallin tuni channin kamachal jingin ahi, maban a jong taonan neihin geldoh jingun tin Pakai minin kangailut houbung miteho kahin tem kit in ahi.

Kakipah e.

Keima Pakai lhacha
Lhingneikim@neoshi
Cambodia

MEN DEPARTMENT NATHO MACHAL JING**Kipa thu phon**

Pathen leng Gam na etoh khom nao adeh a KBC Men Department in project alenloi khat na enei u, LOM RESOURCE CENTRE jong hi ahi in, hijeh chun assembly'n in tukum a munna natho pattah ding tia ekilol bang uvin, jokham kham min etong jing taovin ahi. Kithokhom hat na ahibang ngin, eihojong hatah in pan elakhom uvin ahileh toh doh tampi eneitaovin hatching nung pathen thangvah in umta hen.

GAMBI NO.1. GAMBIH LE HOUBUNG A KON AHUNGKONHO

Chassad Avenue, C/C Lamphel, C/C NGV, C/C Canan Veng, C/C Haokip Veng chule C/C Langgol Pate cheng ngin tomngai tah in pan ahung la uve. **Gambih no.4.** sunga Saitu pate, C/C S. Salem Sapormeina paten fancing agen chai uve, G.Lhangjol paten Go phung (go keh) ahungphut uve. **Gambih no.19.** Pate mitampi nikhat konnin ahung kon uvin, najong lentah atong doh uve.



Gambih le houbung a konna pan hungla pate hojallin na lentah etong doh uvin, amaho jouse chung a jong kipa thu ephong uve. Pathen nin phatthei boh jing tao hen.

TEPNA LEH HETSAH:

Ahung lhung ding 16th june 2019 hi pate nikho ahi toh lhon nin, Houbung tin leh Gambih tin na pate'n thanon tah a pate nikho hi eman cheh diovin pakai min nin kahin tem uve, chule programe hi anop nathei chan na eima eima Houbung ngin kasep uva eman diovin ahungki hetsah e. Thupi: Phatthei channa mipa. Genesis.12: 1-3. Ahi e. Chule pathen nin pate nikho pathen loupi nadin eiman sah cheh tao hen . Amen.

2019 NUTE NIKHO KIMAN NA CHUNGA KIPA THUSEINA

Amasan Houbung mithengte jouse nabon chaovin ngailutna Salam kahinpeuve. Tukum 2019 Nute Nikho Thupi: 'Navah u chu miho anga kilanghen' (Mt 5:16) mangcha a amun mun a Nute hole Houbung miten thanom tah a Nute Nikho lamchom chom



a kisuh halna toh kop a kichep golseh na a mangloi, Seminar a mangloi, chule anikho a Laa le Bible chang kitet na a mangloi, kigot na thupi tah tah a sumle pai tha le jung tamtah lut na hita-banga kithu ngaina jalla nikho loupitah inaman cheh u akihen nachung cheh uva kipa thu Pakai minin Convention Nute ho jouse thalhengin sangtah in ahung kiseije. Chujongle hiche nikho a Speaker a pangho jouse chung a kipathu akiseije. Pathenin tu maban a jong hiche sanga kithu ngaijo a na lentah tah tongdoh dingin phat thei eiboh cheh tao hen. Kakipah e.

LYDIA RESOURCES CENTRE HUNGVIL



Achesa Dt.18/5/2019 Saturday nichun Gambih No.21 ho gambih pastor pu le a inneipi le Gambih lamkai ho jousen LYDIA RESOURCES CENTRE thilpeh,tilkhoulw taopeh natoh eihung vil un abonchao chungu Pakai min in kipathu kahinphonge.Thilpeh chu Local rice one bag ahi. Kakipah uve Pathen gambih no.21 phatthei boh tachen.

KBC WOMEN COUNCIL KOUNA

Amun : KBC Office Chapel Hall

Anikho : 25th July, 2019 (Thursday)

Aphat : 11:00 am - 02:00pm

Council member dingho:

1. President nukhahpen
2. Secretary nukhahpen
3. Women Work Committee ho.
4. Gambih Women Chairperson, Secretary chule Treasurer.

Amasan imunpiu KBC Office a konin ngailut na Salaam Pakai minin kahin peuve.

Pathen lungset a phat pha anaum le chungahung kipe nikho le phat a hi KBC Assembly kiphatsah dungjuja Council umkit tadinga kiphatsah natoh lhon a Women Council jong kum 6 jouva amasapen a itou kit diu ahitan, hijeh chun toh le tham dang khoh jongle Pakai min a nahung kisuh onguva Gambih jousea Chairperson, Secy, Treasurer thon louva hung pang cheh dingin tiemna le hetsah sahna ahung kineije.

Hiche nikho le hin Office a pehdinga lom ho : Membership Fund, Khutship, Anngol taona, Meithai nikho, Nute nikho, Talent le dang dang jong nahin khoh khop tup uva poh cheh diuvin jong hetsah na kahin nei uve. Pathenin ikiloi khomna KBC Women Department phat thei boh jing taken. Damsel a Council itou theina diuvin taona in pan lacheh ute. Kakipah e.

Pakai lhacha,

Lhingjanem Haokip
Secretary, Women Dept, KBC

YOUTH LEADERS MEET

KBC Cnetre Church, New Lambulane mun a hi nisim 5th June 2019 nikho a Youth Leaders Meet hi chelha dinga kigong chu ahitai. Hichea hi Youth lamkai kiti tapou pou chu pangchekh dinga jong temna ahung kineiye.

YWC TOUR

Convention Youth Work Committee Tour akiche jingin hito lhon chun tuni chan in Gambih No. 3, 6, 7, 14, 15, 16, 19, akiche doh in



ahi. Tulha jenga jong Gambih phabeppi vildingin jong akigelkit in ahi. Hijeh chun mun tin a Youth lamkai chengin jong Convention YWC cheng hungna ding lampi hingong jing dingin jong temna ahung kineiye.

IGNITE WORSHIP TEAM

Youth Connect a dingin Ignite Worship Team ahung kipan in hiche worship team hohin Pathen houna lampang le Pathen vahchoina lampanga Youths Connect teng eilamkai diu Live a Worship service



umding ahi. Hiche a panla ding chengin tuni chan in kichuhna amun mun in aneijingun hiche kichuhna hungmu jouse lunglaiya hin kip-ana le thanopna apejingin ahi.

YOUTH CONNECT

Gambih jousea Youth ten ingalel jingu Youth Connect hi ahitai. Hichea dinghin tuni chan in Gambih tampin kigotna apan tauvin, chule kitetna dingin jong kichuhna achelhah jinglai ahi. Football



kichuhna, Choir kichuhna kitiho hi tutadi a hi kichuhna kihamu pen chu ahi. Hito Ihon chun Gambih jousea Youth Connctet king-on a hi Youth jouse thonlouva pangcheh din jong temna ahung kineiye.

YOUTH CONNECT T-SHIRT

Youth Connect T-shirt hi Convention Youth lamkai chengin ahin boipiuvin ahin semdoh tauvin hito Ihon chun hiche T-shirt hi nulepa pilepu hihen Gambih jousea Youth member jouse hijngleh Rs. 300/- a neichohpeh diuva temna sangpen ahung kineiye.

BQ APPLICATION FORM

Kumseh a kiboljing BQ hi tukum jong October 13, Sunday nikho leh Exam center jousea boldinga tohgona ahitoh Ihon in Application Form jong copy 2500 lang akihom doh in ahi. Koitobang gambih adeibe aumnahlai leh Office lam a kijahto a kilahbe jing thei jong ahi. Hito kisaiya hetsah nom chu ahileh Application Form a hi Admit Card jong umtha ahin hiche Admit Card hi Exam nikho chan a kikoitup cheh ding ahi.

Sunday School Awareness Campaign - 2019

2019 kum sung'a ding'a Sunday School Awareness Campaign amasa'a Zalenbugg Baptist Church, gambih Centre, KBC gambih No 2 a anakibol banjomin 4th May, 2019 (Saturday) ni'n New Keithelmanbi Baptist Church, gambih Centre, KBC gambih No. 7 ah



anivei chgan'na Sunday School Awareness Campaign anakibolin ahi. Resource Person in Rev. Haoneo Haokip, Secretary, Literature & Publication, KBC le Rev. Dr. Paul Paolen Haokip, Committee member, Literature & Publication, KBC, lecturer, M.T.C apang lhonin, kin lamkaiyin Pu Ngullam Kipgen, Committee member, Literature & Publication, KBC apangin ahi. Ngansena anakinei dungjuiya kik-hopna dingle mi khop tupna ima'a pontho tah le lolhing tah a pan anala gambih Pastor Rev. Khupthang Kilong le atoh khompi gambih lamakai ho, Kikhopna mun toh doh le neh le don, toh le tham ijakaiya lung le tha'a pan eilah peh u New Keithelmanbi houbung lamkaiho le houbung mite, chule ahung kalsong'a kikhop lona kingon hung lholhin sah houbung, houbung'a kon'a hung kalsong houbung lamkai ho, Sunday School Superintendent ho le jilkung ho jouse chungu Pakai minin kipa thu sang tah ahung kiphongin ahi. Kikhopn'a a kiseiho iphat chompi teidiu tahsan le kinepna pumin, Sunday School lam machalbe theina ding'a isei ho'u in-abol/ inachepi teidiuvin Pkai minin ikitemuvin ahi.

Literary Meet - 2019

Imakho'uva um toh gon (Literary Meet - 2019) hi ahunglung ding 10th August, 2019 (Second Saturday) ni le Centre Church, New Lambulane, Imphal mun'a umding ahi. Hiche masang'a chu Individual item ho le la kitetna hoa Final Round a ding'a Top Five kilhen'na Pre-Literary Meet umding ahi. Literary Meet -2019 a ding'a hetsahna lekha thot anakibol dungjuia gambih Pator ho le gambih lamkai hon tomngai tah a igambih, igambih uva thonlouva ainagon pan tah diuvin Pakai minin ikitemuve. Chule houbung, houbung'a lamkaiho le Sunday School lam'a mopo Superintendent ho le jilkung hon jong nasatah a pan inalah'uva inakigon pat tah diuvin Pakai minin ikitemuve. Gambih Pastor ho le lamkai ho akitimo beh seh inaum khah'uva ahile feltah a mopo thei gambih Youth teho ahiloule akipeitheih dang dangho jong mopohna iphe'uva gambih jouse le houbung jouse thonlouva pan latei dia anakigonuva inapan cheh diuvin avel velin Pakai minin ikitemuvin ahi. Individual Competition Item (Essay writing, Poetry writing, Painting, Extempore speech) ho'a pan ladinghon KBC Office a Application form ihung kilah'uva June lha kichai kah a Submit ihin lebol kit diu ahi.

Bible Pumpi Thumvei Simchai Masa Kitetna

Kum khat (2019) sung'a Bibnle pumpi thumvei simchai masapen kitetna chu nasatah le ponthjo tah a pan la imumtei diu tahsan le kinap aumin,pontho tah a pan analaho jouse chung'a Pakaiminin kipa thu sangtah ahung kiphonge. Asimchai jong um maithei tantin, asimchai kon jong um maithei tan tin, asim chai chaiyin asimchaina lha, nikho le nidan ho Literature secretary heng'a ihin hetsah pai diu ahi. Asimchai masapen khat'a pat thum chan'a dia kipaman tohdoh mi aumtan, ahintoh doh ho chung'a pakai minin avelin kipa thu sang tah ahung kiphong kit e. Pontho tah a Pathen thu simho kipapina jalin, asimchai lina'a pat som chan ho lah mikhat'a dingin kipaman Pakai minin Rs. 1000/ penge, ti koitobang iumkhah ule

Pakai minin kipah tah in lem ihijinguve.

New Testament General knowledge Competitive Examination -2019

Kumlhun tohgon'a New Testament (Thulhun Thah) pumpi General Knowledge Competitive Examination a pan lading'a kigong jong iumpan tah diu tahsan le kinep aumin, ahithe chan'a thanom tah le pontho tah a pan inalah cheh diuin Pakai minin avelin temna le hetsahna ahung kinei kit in ahi. Hiche'a ding'a kipaman First, Second, Third, chule Consolation (4th - 10th) ho'a ding'a kipaman tohdoh mi aumtai. Amaho jouse chung'a Pakai minin avelin kipa thu sangtah in ahung kiphong kit e. Hiche Exam a pan lading hon jong Application Form KBC Office'a kon'a ihung kilah theiyu ahitai.

* Hetsahna lekha/ thuthot hungkibol ho hi lekha thot hihen, KBC Thuso'a hijongle houbung mi ahephalou anaum nom ji'n ahi. Hi-jeh chun, lekhatthot Copy hung kibol le KBC Thuso chang'a anasim ji gambih pastor, gambih lamkaiho, chule houbung lamkaiho'n isimdoh u nasah mo'a immang bol louva, isimdoh dungjuyuva hetsah ding'a lomho inakihet sah to teiyuva, akiseiho bang'a pan ialah'uva inakigon cheh teidiuin avelin, Pakai minin temna le hetsahna ahung kineiyin ahi.

Rev. Haoneo Haokip

Secretary, Literature & Publication, KBC

KUKI BAPTIST CONVENTION DEACON'S TRAINING



Nisim 22-24 May 2019 sung in Salom Theological Seminary organised bolna noijah Deacon's Training Centre Church Chavangphai KBC Gambih No. 15 mun ah Gambih 14/15 kigom in akineijin gambih sung a Deacon mi 30 val in thanom tah le lolhing tah in ana kibolkhom in ahi.

GAMBIH NO. 11 THUSOH LAHKHOM

Pathen phatna jal in KBC Gambih No 11 sunga Tour umho- Executive tour, Men Department Tour, Women Department Tour le Youth Tour lolhingsel in akikol chai sohtai.



May 18-19,2019 sung ah Twisomjang Baptist church in Nute Nikho le Pate Nikho lolhing tah in ana mangkhom uvin ahi. Hiche kin goun achun Bong khat atthat un, tahsa le lhagaova kisuhhalna ana nei uvin ahi. Gambih sunga Nute Nikho le Pate Nikho Convention hington nikhohoa Gambih Pastor (Rev. Onkho Haokip) achan jou lou jeh uva, Nikho danga amankop uva gambih Pastor speaker a akikou u ahi.

Gambih sunga Houin alui gam tah jeh in houbung phabep in houin thah asadoh tauvin ahi. Hiche banjom chun tutu in houin phabep sahdozna ding tohgon aum jing in ahi.

Ka kipa e
Pu Tinthang Kipgen,
Chairman, KBC Gambih No. 11

Nupa Camp.

Achesa 10-12 May ni sung chun Seitol Khothah KBC Gambih no 9 muna Nupa camp anakibol in ahi. Hia chun camper nupa 12 lam ahung kikhom dohe. Camp Director in Pa Hemsei Haokip Gambih no 9 Mission Chairman apang in chule Speaker in Rev Henjalen Doun- gel Convention Mission Secretary apang in ahi. Kiman chah anomin Pathen jallin lolhing tah in anakichai je.

- Head Deacon, S. Khothah KBC No. 9

Office vilna hung nei

Achesa nisim 16 May 2019 nichun Korea akon Rev Young Su Chung, Director Global Christian Empowerment Association le Director India Mission Fellowship in KBC office vilna eihung neiun ahi. Amaho natoh hi Khangdong Missionary dinga India sunglam hihen gampam lama ding hijong leh lunglutna nejia kondoh nomho lhendoh na anei jiuva training apeh uva chule atohnading munle gama chu asol doh jiu ahi. Eiho khangthah lekhatem koitabang Missionary a vaikon nom aumleh ikijah touva amatohin tohgon inei thei u ahi.



Chule 20th May 2019 nikhon jong Rev Josiah Watters in vilna eihung neiun ahi. Amahi USA gama kon ahin India gam Uttar Pradesh a kum 5 chule Kolkatta khopi a kum 4 sung sopi Muslim ho laha Pathen natong ahi. Staff Devotion alah na a tuni chana Muslim ho laha Pathen natoh dan ase jinn alhangpia Christian ten Tonsot hina thupha seipeh ding ingap chat lou jehuva Muslimho laha Christianity hi deibanga machal lou ahi ati. Amaho hin ahet lou u ahin amaho jong Pathen mingailut nam ahiuvin Pathen thu ahet ding u hi eiho mopoh na ahi tin til khou na eihung neiun ahi.

Consultation Phase 1.

Ning kum 2018 kuma ina bol ngai jing bangun tujum adin Consultation phase 1 chu achesa 14-15 nini sung chun Convention Office Chapel Hall muna anakibol kit in ahi. Hia chun KBC Pastor jouse le kivaikomna lama hetna neihon lungel seikhom na akinei jin ahi. Discussion topic chu ahileh KBC Administration structure, Financial Structure chule Education policy ahi.

Education lamto kisai a policy program neiding dan Pu Hethong Haokip Edify in houlim nale Paper present abolin ahung kikhom jouse kipa nale lung deilam tah ahi.

Convention Administrative structure hi athahbeha structure semphat ding deisah na Rev Dr Thongkhosei Haokip General Secretary in adei dan present abolin mipin lung gelkhom na akinei in ahi. Atamjon athah a hung kigong structure hi deisah na anei un ahi.

Financial structure thua Rev Letpu Kipgen Finance secretary in houlim-nale paper present abolin Administrative structure le Financial structure hi centralised bolding deisah na aphong doh in ahi.

Ngaidan seikhom na akinei jin centralised hisah ding mipi atamjon deisah na aneiijn ahi. Hinlah Mission vang hi hiche policy hin ahop leh houbung sunga Mission natosh lunglutnale thanop na neiho atohkhah a mission natosh lhahsam nathei ahi jallin Mission vang hi Autonomy hijing hen ti deisah na Mission Secretary in phondoh na anei jin ahi.

Seminar on Eradication of Poppy plantation in Manipur.

Hiche thua hin State Government lama kona hetna le theppna neiho toh seminar neikhom na aniveina Pallen Molnoi Centre muna 17th May 2019 nin anakinei khom in ahi. Participant mi 70 vel expect anakibol chu mi 140 lam ahung kikhom doh in lolhing tah in seminar anakichai jin ahi.

Hiche program hi gamsunga Poppy (Kanni) kitu jeha mihem phabep in inn chen nan neijong leh insung tamntah a kana le lung jinna ahung lhun, chule gamleiset ichana kisuse hitam, nikhat leh imacha tuna thei lou gamgo jeng hung kisoha mihemte genthei tah a kihinso joulou va hung umding kichat nale kiven na a thinglhang loubol hokihet them sah a, khonung a hiche muche tujeh a boina hung lhung theiho vendoh nadinga muchi chomdang khat a khel ding deisah na Kuki Baptist Convention le Manipur State Government natosh khom na ahi.

Hiche Seminar a Resource person ho chu

1. Shri Vumlunmang Vualnam IAS Principal Secretary, Govt. of Manipur
2. Dr A. Guneshwar Sharma, CEO, SMPB, Manipur
3. Dr H.Birkumar Singh Principal Scientist NEIST
4. Dr Abiram Singh Joint Director MACS
5. Shree Saklemba Addl. SP, NAB
6. Kh. Basanta Singh Project Co-ordinator Paari Yaipha, IRCA

Ahung kikhom mipi jousen Kani lei bol hi houdan to kitoh lou ahina bana khonung inamsung le society sung chule igam leiset u hinsuse thei muchi ahina hetdohbe na aneiun ahi. Inchen nading jenga lung gel louva khonung leiset hinding dan gelkhoh a pan ladinga ikigot cheh uva imuchi tu uhi ahithe chana agang thei lampena ikhel teidiu deisah na Resource person hon eiseipeh un ahi.

Pathen in pha asah le hiche program hi Manipur mipi jousen aheththem tei nadia state wide launching program jong hung kibol vah ding ahitai. Manipur Chief Minister in loupi tah a hondoh na anei nading toh gon jong akinei jin alolhin thei nadin itaonao vah gelding jing u hite.

DANA CHUNGA KIPA THUSEINA



Ka it tah kainneipu (Late) Pu Vummang Haokip (Rev. Ngamneo penna apa) in hetman louva 29th March, 2019 nilhah langa eina dalhah nao chungatunin hiche KBC Thuso mangchan, RIMS Hospital mun a eihin del lut ho jouseu chule KBC Gen, Secy, Rev. Dr Thongsei Haokip le atoh khompi hon Pathen henga taona a eihung vailhah nao goh hilouva KBC Ambulance a inn mun chan a eihung thah peh nao, keng le kanga ajapha jouse eihin del lut uva eihung lhamon ho jouseu, chule jan khovah a ngailut na jalla along opma jan hah khovah jouse le akivui nia mi chujat jat Pathen na ngailut nao jalla kei ho insung mite chan dinga kilom lou ngailut na kachan hou kangaiton kadam sunguva kasah jou lou diu khop a ngailutna kachan ho, kachapa Pastor Ngamneo in atoh khompi ho, tua keiman Gambih sunga katoh khom pi ho, chule

lhangsung haosa ho le mipite naija le gamla a kon'a hung ho jouse, tuni chan geija insunga lhamon thu le tao na a eihungvil ho jouse chungatunin amichang cheh in nakom uva kipa thu kahung sei joupon, hijeh chun hiche ikiloi khom nao KBC Thuso hi mangcha in amichang cheh chungatunin kakipa na thu insung mite jouse thalhengin kahin phonge. Pathen in keiho insung neingailut nao bangin ngailut na nachan cheh tao hen.

Keima,
NI Munneikim Haokip, Semol B/Church,
Women Chairperson KBC No. 2

Taona ngaichatna:

Kapa in hetmanlou a eihin dalhah ule Kanu NI. Munneikim Haokip hi lunggim toh anneh tuidon kisuh talou imut phat kisuh talouva kahung umsot phat un Gilpi nat ahung khoh sen, Doctor ho advise dungjujin neh le chah phatea nehding, Rest lah ding atiuvin, Gambih lamkai khat hina a tour chenading le pan lah na ding ijat ham a pan alathei tapon, hijeh chun muntin a Houbung miten neitaopeh uleh dam ding ahi ti kakinem uve. Pathenin phat thei eiboh cheh tao hen.

Keima,

Rev. Ngamneo Haokip, Pastor Centre Church Chassad.

CONDOLANCE

Pu Evan. Haolet Chongloi in 23/5/2019 nikhon eina dalha taove. kum 78



Tohkhompi Pu Evan, Haolet Chongloi jin achesa nisim 23 May 2019 nikon atahsa kum 78 alhin in angailut insungmi chuleh atohkhompi cheng eina dalha tao ve amahi Wakotphai I T Road a kon ahi, Voluntery Evangelist a Tuilanghom Gamkai sung a Pathen na ahin tongin Phat chom khat jouvin KBC Evangelist khat in ahung pang in KBC gamsunga ajochan a Pathen na ahintoh a Pension chan geija pontho tah a pan hila ahin, Bible lungchin chang sao tah tah seithei mipa it umtah le homtho umtah ahi. Aman eidalhah u hi KBC Houbung mite a dinga thomhao umtah le it um tah Pathen lhacha khat ahi.

Pathen in adalhah insung mite le Houbung mite ho lungmon na eipe tao hen.



17th May 2019 nikhoa One day awarness campaign on Education of Poppy plantation pallen mun ah lolhing tah in ana kibol tai.

11 May 2019 nikhoa L. Salemphei (Wakan) Houbung Kum 50 Ihinna KBC Gen. Secy. Rev. Dr. Thongkhosei in Song honna jin Hou in thah kot honna Pastor Ngamkhopao in aneitai



Post Regd. MNP/81
Regd No. 18134/88



2019 Nute Nikho May 12 nia Houbung chomchom a kiman na

If undelivered, please return to
The Editor, KBC Thuso
KUKI BAPTIST CONVENTION
Opp. DM College, Imphal - 795 001
Contact: 9862633173